

Ilinniarfinni meeqqallu atuarfiini attaveqatigiinnikkut teknologip ukunatigut atornerqarnerata annertusarneqarnissaanik attaveqaatillu pitsanngorsarneqarnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut:

1. Internetsi ilinniarfinni atuarfinilu tamani killilersugaanngitsumik atorneqarsinnaalersinneqassaaq.
2. Attaveqaatit pitsaanerpaat (sukkanerpaat) ilinniarfinni tamani pilersinneqassapput.
3. Ungasianiit ilinniartitsinerup atornerqarnerulernissaa siunertaralugu “ungasianiit ilinniartitsivimmik” pilersitsisoqassaaq. Ungasianiit ilinniartitsiviup pingaarnertut salliutillugulu suliarissavaa nunaqarfinni meeqqat atuarfiini atuartitsissutit ilinniartitsisussaaleqiffiusut naammaginaratumik atuartitsissutaalernissaat anguniassallugu. (Inatsisartunut ilaasortaq, Kaali Olsen, Inuit Ataqtigiit)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut siunnersuummut pissanganartumut qujapput.

Siunnersuuteqartup oqaatigisaatut atuarfeqarnermi ilinniarfeqarnermilu ulluinnarni atuartitsinermi internetimik atuinermi periarfissarpassuaqarlunilu iluaqutissarpassuaqarpoq. Taamatuttaaq ilumoorpoq ATTAT-mmi internetimi kiffartuussissuterpasuit soorlu nipilersuutit, videot attaveqarfiillu mattunneqarmata. Mattussinerit taakku aningaasaqarnermiinnaq tunngaveqarput – tassa imaappoq aningaasaliissutit aningaasanut inatsimmi immikkoortineqartut internetimillu atuinermit akit akornanni naapertuutinnitsoqarnera, pissutigalugu.

Siunnersuuteqartoq allappoq attaveqaatit aqquataasa imaqqortusinerisigut atuisuniillu amerlanerusunit ataatsikkut atorneqarsinnaanngornerisigut kiisalu ATTAT-mmi matusat ikinnerutinnerisigut IKT-p, tassunga ilanngullugu internetip ulluinnarni atuartitsinermit atortutut paasisassarsiorfittullu ilanngunneqarnissaat periarfissaassasoq. Taamatuttaaq allappoq attaveqaatit aqquataasa imaqqortusinerisigut atuisuniillu amerlanerusunit ataatsikkut atorneqarsinnaanngornerisigut matusallu ikinnerutinnerisigut ungasianit atuartitsinermit atugassarititaasut pitsaanerujussuanngorsinnaasut. Tamatumunnga atatillugu ”Ungasianit ilinniartitsiveqalernissaq” siunnersuutigineqarpoq. Kiisalu ilaqutariippasuit teknologiimik nutaamik atuinissamut suli periarfissaqanngitsut oqaatigineqarpoq tamatumalu ilaqutariit taakku nalinginnaasumik ineriartornermi kinguaattoornerat kingunerisinnaagaa.

Tamakku Naalakkersuisut isumaqatigaat.

Qarasaasiakkut ilinniarneq pillugu ataatsimeersuarnermut Sarfarissumut qanittukkut pisumut atatillugu TELE Greenlandip atuinermit akeqartitsinera pillugu ajornartorsiutit eqqartugaa-sorujussuupput.

Tamatumunnga atatillugu TELE Greenlandimit, Aningaasaqarnermut Sulisoqarnermullu Aqutsisoqarfimmit kiisalu Kultureqarnermut, Ilinniartitaanermut, Ilisimatusarnermut Ilagee-

qarnermullu Aqutsisoqarfimmit Sarfarissumut aqutsisoqatigiinnit saqqummiunneqarpoq TELE, Namminersorlutik Oqartussat aamma KANUKOKA attaveqaatit aqquataasa imaqqortusineqarnissaannut atuisuniillu amerlanerusunit ataatsikkut atorneqarsinnaangornissaannut kiisalu matusat ikinnerutinneqarnissaannut ilinniartitaanermi pisariaqartinneqartunik malinniffiusinnaasumik akeqartitsilernissamut periarfissanik ataatsimut eqqartuissasut.

Tamatuma saniatigut ataatsimeersuarnermi aamma isumaqatigiissutigineqarpoq attaveqaannarneq naammanngitsoq. IKT atuakkat, pappiaqqat aqerluusallu assigalugit atuartitsinermut pissusissamisoortutut atuartitsinermut sulii ilanngunneqanngilaq. Tamatumunnga atatillugu qaffasissutsini tamani atuartitsisunik ilinniartitseqqittarnermut ingerlaqqiffiusumillu ilinniartitsisarnermut tunngatillugu kinguaattooqqasoqarpoq. Tamanna IKT-p ilinniartitaanermi atugaanerulernissaanut pilersaarutissamut ilanngunneqassaaq pilersaarullu taanna sapinngisamik internetikkut periarfissaqarnerulernermut ataqatigiissaarneqassalluni.

Assersuutigalugu internetikkut pitsaannerusumik attaveqalernikkut atuartitsisut ungasianit atuartitsinikkut ilinniarteqqinneqarnissaannut ingerlaqqiffiusumillu ilinniartinneqarnissaannut periarfissaqarnerulissaaq, imaaqqunartumik pikkorissartitsinerit nutaaliorfiusumik atuartitsinermik ilinniartunut ingerlaannaq iluaqutaasussanik suliaqarnissamut atorneqarnissaat siuarsarlugu.

Isummat tamakku tamaasa Naalakkersuisut pissanganartippaat. Taamaattumik TELE aamma KANUKOKA suleqatigalugit taakku Naalakkersuisut malersornialersaarpaat, ilinniarfinnut interneteqartitsineq pillugu ajornartorsiutip susassaartunut tamanut aaqinneqarnissaa anguniarlugu.

Ungasianit ilinniartitsivimmik pilersitsinissamut tunngatillugu Naalakkersuisut isumaqarput taamatut ilusiliisoqassappat taanna Institut for Læringimi pilersinneqartariaqartoq. Taamaaliornikkut ilinniartitsivik ilinniartitsisunut ilikkagassanik, pikkorissartitsinermik ilinniartitsinermillu suliaqarneq pillugu ineriartortitsivioreersunut atalissaaq. IKT-p atuartitsinermut ilanngunneqarnerunissaa pillugu periusissat ilikkagassanik pilersaarusiornermi qanimut suleqateqarluni pinissaat Naalakkersuisut pingaartippaat.

Akissummi matumani allassimasutut attaveqatigiinnermi teknologiip nukittorsarneqartuarnissaa attaveqaatinillu pitsanngorsaannissaaq Naalakkersuisut sulissutiguarpaat.

Taamatut oqaaseqarlutik Naalakkersuisut siunnersuutip akuersarneqarnissaa ataatsimiititaliamullu ingerlatinneqarnissaa innersuussutigaaq.